

Gea a nova mensa e mediateca

■ (rtr) Passa 60% dals votants grischuns din gea a l'edifizi complementar da la mensa e da la mediateca da la scola chantunala a Cuira. La nova mensa e mediateca da la scola chantunala a Cuira po vegnir bajegiada. Grischunas e Grischuns han cun 61,6% da las vuschs ditg cleramain gea al nov bajetg da la scola chantunala. Cun 28 754 cunter 17 934 vuschs ha il suveran approvà il credit da 27 milliuns francs per il nov edificzi complementar en il qual i duai dar sper ina nova mensa ed ina mediateca er locals per la protecziun dals bains culturals. La participaziun a la votaziun è stada plitost pitschna cun 35%.

Be pps era encunter il nov bajetg

Sper il cussegl grond han era prest tut las partidas politicas dal Grischun recumandà d'approvar il project. Encunter eran be la Partida populara dal Grischun e Heinz Brand ch'è a la testa da la pps dal Grischun.

Küblis di cler na

Il pli ferm suandà l'opiniun da Heinz Brand e da la pps èn ils votants da sia regiun. Il pli ferm na cun passa 65% ha i cunquai dà a Cuvlignas/Küblis. Ed er en las vischnancas vischinantas Conters e Saas han passa 60% dals votants refusà il credit per il nov edificzi. En tut han la fin



Quà vegnan la nova mediateca e la mensa da la scola chantunala construidas.

FOTO TH. GSTÖHL

finala ils votants da 14 vischnancas refusà il project da l'edifizi complementar da la scola chantunala. Tranter questas

vischnancas sa chattan tranter auter la vischnanca da Cunter en il Surses (56% na) u era las vischnancas en la Surselva

sco Tujetsch (56%), Mustér (58%), Sumvitg (56%) e Trun (52%). Era ditg na a la nova mensa e mediateca a Cuira

han ils votants da las vischnancas da Lumnezia (54%) e Schluain (53%).

Per tge vai: Il project

Il project, ch'è planisà tenor il standard da Minergie® P-Eco, cumplettescha las infrastructures da scola cun ils locals cuminaivels mancants. Pass per pass èn questas infrastructures vegnidas sanadas ed adattadas dapi l'onn 2006 al manschi. Sco lieu per mangiar, sa scuntrar ed emprender vegn il nov edificzi ad avair ina funcziun da center impurtanta entaifer la scola.

Custs da 27 milliuns francs

Il cussegl grond aveva approvà il project en la sessiun d'october 2014 e quai cun 108 cunter 0 vuschs e 2 abstenziuns. Ils custs da construcziun importan totalmain 27 milliuns francs. 23,5 milliuns francs custan la mensa e la mediateca, 3,5 milliuns francs ils locals per la protecziun dals bains culturals. Ils meds finansials ch'èn necessaris per l'etappa finala da la renovaziun da la scola chantunala grischuna na van betg a quint da las ulteriuras scolas medias en las regiuns.

La pauschala d'investiziun ch'il chantun paga annualmain a questas scolas vegn auzada proporziunalmain suenter l'avertura da la mensa e da la mediateca.